

Ismail Sabri bertemu pemimpin perniagaan utama Jepun

Mei 27, 2022 @ 1:20pm



Ismail Sabri (kiri) berbincang dengan Tsuyoshi Nagano (kanan) di Tokyo, pagi tadi. - BERNAMA

TOKYO: Perdana Menteri, Datuk Seri Ismail Sabri Yaakob bertemu pemimpin-pemimpin perniagaan utama Jepun dalam sesi perniagaan tertutup pagi ini dan mendengar dengan penuh perhatian bagi meneroka potensi minat mereka selanjutnya terhadap Malaysia.

Pemimpin-pemimpin perniagaan itu adalah dari Mitsubishi Power Ltd, Persatuan Ekonomi Jepun Malaysia (JAMECA), Rohm Wako Co Ltd dan Mitsui Fudosan & Co Ltd. Mereka antara lain memaklumkan perkembangan terkini operasi dan aktiviti masing-masing di Malaysia kepada Ismail Sabri.

Presiden dan Ketua Pegawai Eksekutif Mitsubishi Power Ltd, Hideshi Kawamoto, berkata beliau menjelaskan mengenai penyelesaian kuasa turbin gas kecekapan tinggi terkini oleh Mitsubishi.

Presiden JAMECA, Tsuyoshi Nagano ketika ditemui pemberita Malaysia, berkata beliau mengemukakan cadangan untuk menganjurkan seminar Dasar Pandang ke Timur pada Ogos di Malaysia.

Beliau yang juga Pengerusi Tokio Marine Holdings Inc, memaklumkan pihaknya akan menekankan usaha untuk mendapatkan penyertaan generasi muda Jepun dan Malaysia supaya hubungan dua hala ini akan terus dapat dipertingkatkan.

"Saya amat percaya masa depan (hubungan ini) sangat kuat, terlalu banyak perkara yang perlu dilakukan untuk mengukuhkan ekonomi kedua-dua negara. Jadi kita perlu memberi tumpuan kepada generasi baharu untuk mewujudkan pemimpin baharu di kedua-dua negara," katanya.

JAMECA ditubuhkan pada 1977 dengan antara objektifnya untuk memupuk persahabatan dan menggalakkan hubungan ekonomi yang rapat dan harmoni antara Jepun dan Malaysia.

Ia juga bertujuan menggalakkan persefahaman yang lebih mendalam di antara sektor swasta Jepun dan Malaysia mengenai dasar dan situasi ekonomi negara masing-masing.

Semasa sesi pertemuan dengan Rohm Wako Co Ltd, Ismail Sabri turut menyaksikan penyerahan Surat Kelulusan Insentif kepada Rohm Wako susulan cadangan rancangannya memperluas kemudahan pembuatan semikonduktor bernilai hampir RM1 bilion di Kota Bharu, Kelantan.

Dalam pertemuan itu Rohm Wako diwakili Pengasas dan Pengerusi, Datuk Yosuke Yoshioka dan Presiden, Hirofumi Yoshioka.

Ismail Sabri berada di Tokyo selama enam hari bermula Isnin lalu bagi mengadakan lawatan kerja rasmi sulungnya ke Jepun sejak memegang jawatan Perdana Menteri pada Ogos 2021.

Beliau juga menyampaikan ucap-tama pada Persidangan Antarabangsa Mengenai Masa Depan Asia ke-27 atau dikenali sebagai Persidangan Nikkei pada Khamis. - BERNAMA